



Pripadnici SIPA u Tuzli uhapsili pet osoba



Mujačić: Službenik jednog od odjela KPZ-a



Hodžić: Penzionisani direktor KPZ-a Tuzla

IZA BRAVE I BIVSI DIREKTOR ZATVORA

Zbog nezakonitosti u zapošljavanju i poslovanju, među deset uhapšenih i Hasan Hodžić i Robin Mujačić

Službenici Državne agencije za istrage i zaštitu (SIPA) jučer su na području Tuzlanskog kantona pretresli objekte na više lokacija, te uhapsili pet osoba koje se sumnja da su učestvovali u nezakonitom zapošljavanju u Kazneno-popravnom zavodu Tuzla. Akcija kodnog naziva Brava II provedena je po naredbama Kantonalnog suda u Tuzli i Kantonalnog tužilaštva Tuzlanskog kantona.

Oduzeti novac i mobiteli

- Slobode su lišene osobe inicijala H. H, R. M, N. S, F. B. i A. S. zbog postojanja osnovne sumnje da su počinile krivično djelo zloupotreba položaja ili ovlaštenja, u vezi sa nezakonitostima prilikom zapošljavanja više osoba u Kazneno-popravnom zavodu Tuzla i poslovanjem određenih organizacionih jedinica, kazala je Kristina Jozić, policijski službenik SIPA.

U akciji su pretresene prostorije unutar KPZ-a Tuzla, s ciljem pronalaska predmeta koji mogu poslužiti kao dokaz u daljem postupku.

- Prilikom izvršenih pretresa pronađeno je i privremeno oduze-

to više mobilnih telefona i SIM-kartica, veća količina novca u različitim valutama, laptopi, uređaji za pohranu podataka (USB), jedno luksuzno putničko motorno vozilo, vatreno oružje, veća količina poslovne dokumentacije..., istakla je Jozić.

Pored petorice uhapšenih, jučer je u nastavku akcije uhapšeno ili privedeno još pet osoba, nad kojima je obavljena kriminalistička obrada, nakon čega će se odlučiti o njihovom daljem statusu.

Uhapšeni su privedeni u službene prostorije SIPA u RU Tuzla, gdje se nad njima vrši kriminalistička obrada, nakon čega će biti predati nadležnom tužilaštvu na dalje postupanje.

Među uhapšenim su i osobe koje su obnašale ili obnašaju visoke funkcije u KPZ-u Tuzla. Jedan od uhapšenih je i Hasan Hodžić, dugogodišnji direktor tuzlanskog zatvora. Hodžića je 2011. godine Vlada Federacije BiH razriješila dužnosti, uz obrazloženje da je napunio 65 godina. Hodžiću se često zamjeralo da loše upravlja zatvorom, da uzima mito, a iznošene su brojne optužbe na njegov račun, pa i one da je u prijateljskim odnosima sa zatvo-

renicima, a posebno sa zatvorenikom Sanjom Vuletom. No, treba napomenuti da optužbe protiv Hodžića nikada nisu imale sudski epilog, niti su ikada dokazane.

Pomagači

Među uhapšenim je Robin Mujačić, službenik u poluotvorenom odjelu ovog zatvora, smještenom na Kozlovcu kod Tuzle. Nakon razrješenja Hodžića, Mujačić je bio najozbiljniji kandidat za novog direktora. On, kako se moglo čuti, nije bio u dobrim odnosima sa Hodžićem. Ostali uhapšeni su bili navodno pomagači u počinjenju krivičnih djela, za koja ih Tužilaštvo TK-a tereti.

Inače, u julu 2013. godine SIPA je u ovom kantonu realizovala akciju kodnog naziva Brava, u kojoj je uhapšeno 12 osoba. Među njima je bilo i pet policijskih službenika koji su radili u KPZ-u Tuzla: Meho Karić, Meris Halilčević, Jasenko Selimović, Nenad Čuković i Admir Džinić. Oni su tada uhapšeni u vezi sa krivičnim djelima zloupotrebe službenog položaja i neovlaštenog prometa teških opojnih droga.